



**DE COLABORACIÓN ENTRE A CONSELLERÍA DE CULTURA, EDUCACIÓN E
ORDENACIÓN UNIVERSITARIA E A UNIVERSIDADE DE SANTIAGO DE COMPOSTELA EN
MATERIA DE NORMALIZACIÓN LINGÜÍSTICA**

En Santiago de Compostela 21 de marzo de 2016

REÚNENSE

Don....., conselleiro de Cultura, Educación e Ordenación Universitaria, que actúa en virtude das facultades atribuídas no artigo 34 da Lei 1/1983, do 22 de febreiro, reguladora da Xunta e da súa Presidencia, modificada pola Lei 11/1988, do 20 de outubro e pola Lei 12/2007, do 27 de xullo, de acordo co seu nomeamento polo Decreto 15/2015, do 9 de febreiro, e no uso das atribucións que lle confire o Decreto 4/2013, do 10 de xaneiro, publicado no DOG número 13, do 18 de xaneiro, no que se establece a estrutura orgánica da Consellería de Cultura, Educación e Ordenación Universitaria.

Don....., reitor magnífico da Universidade de Santiago de Compostela, en virtude do establecido nos seus estatutos e do nomeamento como reitor polo Decreto 62/2014, do 28 de maio, (DOG nº 105 do 4 de xuño de 2014), actuando en nome e representación da devandita entidade.

EXPOÑEN

1. Que ambas as dúas institucións consideran como referente normativo básico da súa actuación o artigo 5 do Estatuto de autonomía de Galicia e o artigo 15 da Lei 3/1983, do 15 de xuño, de normalización lingüística, segundo os que o profesorado e o alumnado no nivel universitario teñen o dereito de empregar a lingua oficial da súa preferencia. Que o Goberno Galego e as autoridades universitarias arbitrarán as medidas oportunas para normalizar o uso do galego no ensino universitario e facer efectivo este dereito para o alumnado.
2. Que ambas as dúas partes son conscientes da responsabilidade que teñen de colaborar nesta tarefa, así como na implantación das medidas do Plan xeral de normalización da



lingua galega, que aprobou por unanimidade o Pleno da Cámara do Parlamento de Galicia na súa sesión do día 22 de setembro de 2004, destinadas a promover un maior nivel de galeguización no ámbito universitario, tanto na docencia e investigación coma no que se refire ás relacións extra académicas.

3. Que, no ámbito da Administración autonómica galega, a Consellería de Cultura, Educación e Ordenación Universitaria é o órgano a quen lle corresponden as competencias en materia de promoción e ensino da lingua galega e, polo tanto a dirección, planificación, coordinación e execución da política lingüística da Xunta de Galicia.
4. Que é vontade das dúas institucións colaborar para promover e fomentar o uso do galego en todos os planos da actividade universitaria galega, levando a cabo as medidas necesarias cara á formación do persoal, tanto profesorado como alumnado e de administración e servizos, para conseguir normalizar a presenza da lingua galega na Universidade de Santiago de Compostela.
5. Que neste sentido, a Xunta de Galicia e a Universidade de Santiago de Compostela xa no ano 1991 asinaron un convenio marco de colaboración para desenvolver diversas actuacións co fin de conseguir a normalización lingüística no ámbito universitario. Logo do tempo transcorrido, e como queira que as dúas institucións manifestaron a súa vontade de continuar colaborando, na actualidade asínanse convenios anuais para establecer o marco de actuación de ambas as institucións en materia de política lingüística.
6. Que para levar a cabo as actuacións que se prevén neste convenio, pola singularidade do seu obxecto, características específicas e ámbito de actuación, non é posible promover a concorrência pública, xa que a Universidade de Santiago de Compostela é unha institución cunha estrutura de goberno, autonomía e competencias propias establecidas por unha lei orgánica e polos seus propios estatutos.

Polo anteriormente exposto, acordan asinar un convenio de colaboración no ano 2016 que se rexerá polas seguintes

ESTIPULACIÓNS

Primeira.- Obxecto

Este convenio ten por obxecto establecer as bases polas que se rexerá a colaboración entre



a Consellería de Cultura, Educación e Ordenación Universitaria, a través da Secretaría Xeral de Política Lingüística, e a Universidade de Santiago de Compostela para colaborar no desenvolvemento de iniciativas conxuntas para prestixiar e promover no ensino universitario a estima do galego como feito diferencial da nosa comunidade autónoma.

As partes colaborarán na realización dun programa de actuacións orientadas a promover un maior nivel de galeguización das universidades galegas, tanto na docencia, investigación e alumnado como no que se refire a relacións extra académicas.

O programa de actuacións e actividades que se desenvolverán no ano 2016 xúntase como anexo e forma unha parte íntegra deste convenio.

Segunda.- Obrigas da Universidade de Santiago de Compostela

Como compromisos ás obrigas derivadas da Lei 3/1983, do 15 de xuño, de normalización lingüística e do Plan xeral de normalización da lingua galega, mediante a sinatura deste convenio, a USC comprométese a levar a cabo durante o ano 2016 as seguintes accións, que se englobarán dentro das seguintes epígrafes:

1. Actividades de formación

- 4 cursos de lingua galega para non galegofalantes, dos niveis Básico I e Básico II
- 2 obradoiros de elaboración e defensa de traballos de fin de grao ou mestrado
- 1 curso “Mellora o teu discurso oral”
- 1 curso de Elaboración de presentacións dixitais
- 1 curso de Xestión do multilingüismo nas aulas

2. Outras actividades de normalización

- Continuación das campañas de apoio á redacción e defensa en lingua galega de teses de doutoramento
- Dotación dun premio á calidade lingüística dos mellores traballos académicos en cada unha das grandes cinco áreas de coñecemento da universidade (Área de Ciencias da Saúde, Área de Ciencias Sociais e Xurídicas, Área Ciencias, Área de Enxeñaría e Arquitectura, Área de Artes e Humanidades)



- Dotación dun premio á calidade lingüística dos mellores traballos de fin de grao en cada unha das grandes cinco áreas de coñecemento da universidade (Área de Ciencias da Saúde, Área de Ciencias Sociais e Xurídicas, Área Ciencias, Área de Enxeñaría e Arquitectura, Área de Artes e Humanidades)
- Dotación dun premio á calidade lingüística dos mellores traballos de fin de mestrado en cada unha das grandes cinco áreas de coñecemento da universidade (Área de Ciencias da Saúde, Área de Ciencias Sociais e Xurídicas, Área Ciencias, Área de Enxeñaría e Arquitectura, Área de Artes e Humanidades)
- Certame literario en lingua galega dirixido ao estudantado da Universidade de Santiago de Compostela
- Organización das IX Xornadas de Recursos Educativos en Galego

A USC comprométese a publicar e difundir debidamente os materiais científicos ou didácticos en galego obxecto deste convenio, en soporte papel e na páxina web, para poñelos á disposición dos investigadores e do público en xeral.

Terceira.- Financiamento

O importe total das actividades previstas no convenio ascende a **cincuenta e seis mil euros (56.000,00 €)** que serán sufragados coa achega de ambas as dúas partes coa seguinte desagregación:

1. A Consellería de Cultura, Educación e Ordenación Universitaria, a través da Secretaría Xeral de Política Lingüística, contribuirá no desenvolvemento das actividades previstas neste convenio cunha achega total por importe de **vinte e oito mil euros (28.000,00 €)** con cargo aos orzamentos xerais da Comunidade Autónoma de Galicia para o ano 2016. Esta cantidade destinarase ás seguintes accións desagregadas nas seguintes partidas orzamentarias:

-Cursos de formación en lingua galega: **quinze mil euros (15.000,00 €)**, con cargo á partida 10.30.151A.640.2, que se destinarán ao pagamento do profesorado que imparte os cursos.



- Elaboración de material, publicacións, campañas, xornadas e demais actuacións de normalización: **trece mil euros (13.000,00 €)**, con cargo á partida 10.30.151A.640.0.

2. A Universidade de Santiago de Compostela achegará, a través do funcionamento do Servizo de Normalización Lingüística, a cantidade restante de **vinte e oito mil euros (28.000,00 €)**.

A valoración das actuacións e actividades que se desenvolverán no ano 2016 xúntase como anexo e forma unha parte íntegra deste convenio.

De non alcanzarse o total do orzamento das actividades, a achega de ambas as dúas partes verase reducida na mesma proporción.

Ditas achegas financiarán exclusivamente o custo de realización das actividades obxecto deste convenio, sen que ningunha das partes convenientes obteña lucro ningún.

Ambas as dúas partes convenientes, compartirán a titularidade dos estudos, publicacións e demais materiais que se realicen ao abeiro deste convenio.

O uso e a difusión sobre os ditos estudos, publicacións e demais materiais terá carácter gratuíto para as partes asinantes do convenio, logo do consentimento da outra parte.

Cuarta.- Xustificación e pagamento

Para percibir a cantidade que achega a Consellería de Cultura, Educación e Ordenación Universitaria e que se indica na estipulación anterior, a USC entregará na Secretaría Xeral de Política Lingüística, coa data límite do 30 de novembro de 2016, a seguinte documentación:

- Certificación (dúas copias) de quen dentro da universidade sexa competente para acreditar a realización das actividades do convenio, de que se executaron as actividades previstas, xunto coas correspondentes notas de cargo emitidas polo servizo correspondente da universidade.
- Un informe (dúas copias) de resultados das actividades que se realizaron no marco do convenio e da súa incidencia na promoción da lingua.
- Para control das actividades que se prevén no convenio, no caso de que se elaboren materiais, reproducións ou publicacións relacionadas coas actuacións acordadas, entregárase un exemplar das mesmas.



A entidade procurará utilizar o galego en todas as comunicacións que estableza coa Consellería de Cultura, Educación e Ordenación Universitaria.

Antes de proceder á sinatura deste convenio e para o pagamento, deberá presentar:

- Certificado de non ter pendente de pagamento ningunha débeda coa Administración pública da Comunidade Autónoma de Galicia, expedido pola Consellería de Facenda.
- Certificado de estar ao día nas obrigas tributarias, expedido pola correspondente delegación ou axencia do Ministerio de Economía e Facenda.
- Certificado de atoparse ao corrente das obrigas sociais, expedido pola Tesourería da Seguridade Social.

A sinatura deste convenio comportará a autorización ao órgano xestor para solicitar as certificacións que deban emitir a Axencia Estatal da Administración Tributaria, a Tesourería da Seguridade Social e a Consellería de Facenda da Xunta de Galicia.

A universidade facilitará toda a información que lle sexa requirida pola Consellería de Cultura, Educación e Ordenación Universitaria, así como pola Intervención Xeral da Comunidade Autónoma, polo Consello de Contas e polo Tribunal de Contas no exercicio das súas funcións de fiscalización e control.

Quinta.- Rexistro de Convenios. Transparencia e bo goberno

A sinatura deste convenio suporá o consentimento expreso do interesado á administración para incluír e facer públicos os datos referidos ao convenio de conformidade co artigo 15 da Lei 1/2016, do 18 de xaneiro, de transparencia e bo goberno, co artigo 8 da Lei 19/2013, do 9 de decembro, (BOE 10-12-2013) de transparencia, acceso á información pública e bo goberno e co Decreto 126/2006, do 20 de xullo, polo que se regula o rexistro de convenios da Xunta de Galicia.

Sexta.- Vixencia

Este convenio estará vixente dende a data da súa sinatura ata o 30 de novembro de 2016. Non obstante, este convenio poderá extinguirse por acordo mutuo e voluntario das partes, por desestimento dalgunha ou por denuncia do mesmo por incumprimento dos compromisos adquiridos, o que se comunicará de xeito fidedigno, previa audiencia da outra parte e con polo menos, un mes de antelación.

Sétima.- Causas de resolución

Este convenio resolverase:

- Por incumprimento total ou parcial dalgún dos seus acordos.
- Polo transcurso do tempo estipulado sen que se culminen as accións acordadas.

De se resolver o convenio, a Consellería de Cultura, Educación e Ordenación Universitaria pode, de ser o caso, esixir a devolución das cantidades achegadas e os correspondentes xuros.

Oitava.- Responsabilidade das actuacións

O asinamento deste convenio non implica relación contractual ou de calquera outro tipo entre as persoas que vaian desenvolver as accións previstas no acordo primeiro e a Xunta, de tal xeito que a esta non se lle pode esixir responsabilidade ningunha -nin directa, nin indirecta, nin subsidiaria- polos actos ou feitos acaecidos no desenvolvemento do convenio.

Novena.- Comisión de seguimento

Créase unha comisión de seguimento que supervisará e avaliará a correcta execución das actividades obxecto deste convenio, que se constituirá con dous representantes da Secretaría Xeral de Política Lingüística, que nomee o seu titular, e dous representantes da USC.

Esta comisión, que presidirá un dos representantes de Política Lingüística, estará facultada para resolver cantas dúbidas xurdan na súa execución. Os acordos que se adopten neste sentido serán inmediatamente executivos.

Décima.- Utilización da lingua galega

Todas as actividades que se realicen ao abeiro deste convenio deberán levarse a cabo de acordo co indicado nas vixentes normas ortográficas e morfolóxicas do idioma galego, aprobadas pola Real Academia Galega no ano 2003, tal e como se establece na disposición adicional da Lei 3/1983, do 15 de xuño de normalización lingüística.

Así mesmo, coidarase especialmente do respecto rigoroso da toponimia oficial nos termos previstos no artigo 10 da citada lei. Será considerada causa específica de resolución deste convenio o incumprimento desta cláusula.



Décimo primeira.- Difusión da colaboración das partes

Nas actuacións informativas e divulgativas e nas publicacións que se fagan relacionadas coas actividades deste convenio farase constar, nun lugar destacado, a colaboración das partes e utilizaranse, cando proceda, os anagramas de cada unha das entidades aprobados pola normativa de identidade corporativa.

Así mesmo, sexa cal for o medio de difusión, cada unha das partes comprométese a facer mención da outra parte e deste convenio.

Décimo segunda.- Avaliación de resultados

A Consellería de Cultura, Educación e Ordenación Universitaria, a través da Secretaría Xeral de Política Lingüística, avaliará a realización das actividades contempladas na estipulación segunda do convenio e a súa incidencia efectiva na dinamización da lingua.

Décimo terceira.- Normativa aplicable e xurisdición

Este convenio ten carácter administrativo e os seus efectos rexeranse polo establecido nas súas estipulacións, e quedará suxeito ao disposto polo Acordo da Xunta de Galicia, do 27 de marzo de 1991, sobre convenios de cooperación con outros entes públicos e de colaboración con particulares, publicado por Resolución da Consellería de Economía e Facenda do 8 de abril de 1991.

Aínda que é un dos excluídos do ámbito de aplicación do Real decreto lexislativo, 3/2011, do 14 de novembro, polo que se aproba o texto refundido da Lei de contratos do sector público, segundo especifica o seu artigo 4, ao non previsto aplicaráselle os principios recollidos na citada lei, co fin de resolver as dúbidas e omisións que puidesen presentarse. Así mesmo, supletoriamente, terase en conta o Decreto lexislativo 1/1999, do 7 de outubro, polo que se aproba o texto refundido da Lei de réxime financeiro e orzamentario de Galicia e demais normativa vixente na materia.

A Intervención Xeral da Comunidade Autónoma verificará a correcta aplicación destas achegas mediante a aplicación das técnicas de fiscalización e auditoría previstas no Decreto



XUNTA DE GALICIA

Lexislativo 1/1999, de 7 de outubro, polo que se aproba o Texto refundido da Lei de réxime financeiro e orzamentario de Galicia e nas normas que a desenvolven e demais normativa vixente.

A xurisdición contencioso administrativa será a competente para dirimir as cuestións que puidesen xurdir da aplicación deste convenio.

Ao estaren as dúas partes conformes co pactado, asínanse tres copias deste convenio.

O conselleiro de Cultura, Educación e
Ordenación Universitaria

O reitor magnífico da Universidade de
Santiago de Compostela



ANEXO

ACHEGA DA SECRETARÍA XERAL DE POLÍTICA LINGÜÍSTICA POR IMPORTE DE 28.000 EUROS

Actividades de formación

- 4 cursos de *lingua galega para non galegofalantes*, dos niveis Básico I e Básico II, de 40 horas de duración cada un, para organizar nos Campus de Santiago de Compostela ou no de Lugo.
8.000 €
- 2 obradoiros de *elaboración e defensa de traballos de fin de grao ou mestrado*, de 30 horas de duración, para organizar no Campus de Santiago de Compostela ou de Lugo.
3.500 €
- 1 curso *Mellora o teu discurso oral*, de 30 horas de duración, para organizar no Campus de Santiago de Compostela
1.250 €
- 1 curso de *Elaboración de presentacións dixitais*, de 30 horas de duración, para organizar no Campus de Santiago de Compostela ou de Lugo.
1.500 €
- 1 curso de *Xestión do multilingüismo nas aulas*, de 10 horas de duración, para organizar no Campus de Santiago de Compostela
750 €

Total actividades formación..... 15.000 €



Outras actividades de normalización

Continuación das campañas de apoio á redacción e defensa en lingua galega de teses de doutoramento,

4.000 €

Dotación dun premio á calidade lingüística dos mellores traballos académicos en cada unha das grandes cinco áreas de coñecemento da universidade, terá unha contía de 150 € por área máis 250 € para a edición de materiais de difusión dos premios:

1.000 €

- Área de ciencias da Saúde
- Área de Ciencias Sociais e Xurídicas
- Área Ciencias
- Área de Enxeñaría e Arquitectura
- Área de Artes e Humanidades

Dotación dun premio á calidade lingüística dos mellores traballos de fin de grao en cada unha das grandes cinco áreas de coñecemento da universidade cunha contía de 300 € por área:

1.500 €

- Área de Ciencias da Saúde
- Área de Ciencias Sociais e Xurídicas
- Área Ciencias
- Área de Enxeñaría e Arquitectura
- Área de Arte e Humanidades

Dotación dun premio á calidade lingüística dos mellores traballos de fin de mestrado en



XUNTA DE GALICIA

cada unha das grandes cinco áreas de coñecemento da universidade cunha contía de 500 € por área:

2.500 €

- Área de Ciencias da Saúde
- Área de Ciencias Sociais e Xurídicas
- Área Ciencias
- Área de Enxeñaría e Arquitectura
- Área de Arte e Humanidades

Dotación dun certame literario en lingua galega dirixido ao estudantado da Universidade de Santiago de Compostela.

1.000 €

Organización das IX Xornadas de Recursos Educativos en Galego, a celebrar na Facultade de Ciencias da Educación.

3.000 €

Total outras actividades..... 13.000 €

ACHEGA DA USC POR IMPORTE DE 28.000 EUROS

Traballo dos Técnicos do Servizo de Normalización Lingüística (organización, asesoramento lingüístico, elaboración de materiais, etc.)



XUNTA DE GALICIA

Total achega USC..... 28.000 €

TOTAL ACTIVIDADES DO CONVENIO 56.000 €